



## Fegl d'infurmaziun: Fusiuns da vischnancas e vopnas Proceder

### En general

Las vischnancas dal chantun Grischun han in emblem uffizial da suveranità: la vopna communal. Cuntrari ad in logo ch'è libramain elegibel, ston vegnir observadas las reglas da l'eraldica<sup>1</sup> e las prescripziuns dal conclus da la regenza dals 7 da november 1952 (DG 175.500) per concepì la vopna.

En cas da fusiuns da vischnancas sto adina er vegnir sclerida la dumonda da la vopna: ubain che la vopna d'ina vischnanca parziala vegn surpigliada senza midadas per la nova vischnanca, ubain ch'i vegn creada ina nova vopna. Novas vopnas ston vegnir approvadas da la regenza. Quai vegn fatg sin proposta da la cumissiun eraldica chantunala ch'è er responsabla che las reglas eraldicas vegnian observadas.

Tut tenor la soluziun ch'ins ha tschernì è la procedura d'approvaziun levamain differenta. Las vias da la procedura vegnan preschentadas curtamain qua sutvart.

### Vias da la procedura

#### 1. Surpigliar ina vopna existenta (vopna communal u cirquitala)

##### 1.1 Regulaziun entaifer la cunvegna da fusiun

La cunvegna da fusiun po cuntegnair in conclus davart il fatg, sch'i vegn surpigliada ina vopna existenta. Cur che la regenza approvescha la cunvegna da fusiun, approvescha ella er la vopna futura. Ina dumonda separada a la cumissiun eraldica n'è betg necessaria en quest cas.

Il conclus respectiv da la regenza va a las vischnancas che han fatg la dumonda, a la cumissiun eraldica ed a l'uffizi da vischnancas.

##### 1.2 Regulaziun ordaifer la cunvegna da fusiun

La nova vischnanca fusiunada concluda tgenina da las vopnas existentas ch'ella vul duvrar en il futur e fa ina dumonda respectiva a la cumissiun eraldica.

La cumissiun eraldica suttametta la proposta a la regenza. Il conclus respectiv da la regenza va a la cumissiun eraldica, a l'uffizi da vischnancas sco er a la nova vischnanca.

### 2. Creaziun d'ina nova vopna

Sco nova vopna vala er mintga cumbinaziun da vopnas communalas existentas<sup>2</sup>. Sch'i vegn creada ina nova vopna, sto vegnir consultada a temp la cumissiun eraldica chantunala. La cumissiun eraldica po intermediar adressas d'eraldicas professiunalas e d'eraldichers professiunals.

Sch'ina nova vopna duai vegnir tschernida en la procedura da concorrenza, ston las participantas ed ils participants enconuscher las reglas da l'eraldica.

<sup>1</sup> vesair il fegl d'infurmaziun da l'archiv dal stadi: Reglas fundamentalas da l'eraldica per vopnas communalas

<sup>2</sup> Talas cumbinaziuns na vegnan betg recumandadas, vesair il fegl d'infurmaziun: Reglas fundamentalas da l'eraldica per vopnas communalas

Cur ch'ins è arrivà ad in accord davart la furma da la nova vopna, fa la nova vischnanca fusiunada ina dumonda a la cumissiun eraldica, la quala da sia vart suttametta ina proposta a la regenza (sco sut 1.2). Il conclus respectiv da la regenza va a la cumissiun eraldica, a l'uffizi da vischnancas sco er a la nova vischnanca.

**Adressa da la cumissiun eraldica chantunala**

Cumissiun eraldica chantunala

c/o Archiv dal stadi dal Grischun

Karlihofplatz

7001 Cuir

081 257 28 03

info@sag.gr.ch